

Na Dr. Edward Cheung Center for Innovation

Prome reunion di docentenan riba sostenibilidad



Loke a cuminsa como un workshop pa docentenan di scolnan secundario den cuadro di e proyecto Green S'Cool, a resulta den e intencion pa no solamente haci un proyecto sostenibel na scol, pero pa laga esaki bira un parti di e curriculum. Asina a lanta di manera spontaneo un grupo di trabou forma dor di docentenan cu e intencion pa esaki bira realidad. Ex-astronauta Wubbo Ockels a dirigi e workshop di asabra mainta na sede di e Dr. Edward Cheung Center of Innovation. "Ta e intencion pa stimula e docentenan pa bin cu ideanan," Ockels a bisa despues di un introduccion di su biahe den espacio. "Nan ta esunnan cu tin e tarea pa laga e muchanan haya entusiasmo pa desaroya proyectonan den cuadro di sostenibilidad. E studiantenan mester pensa cosnan riba nan mes, traha plan y ehecuta proyectonan. Ta nos tareanan pa percura cu nan ta tuma e reto y haya leuk pa haci esaki tambe. Nos mester reta e studiantenan cu competencia, torneonan y mas ainda, laga nan ripara cu ta interesante pa traha cu sostenibilidad y ta duna bo un bon sensacion." Su peticion pa bin cu sugerencianan a produci un lista largo. Algun docente ta kere cu lo ta bon pa bin cu proyectonan

caminda e studiantenan ta investiga preguntanan cu tin di haci cu spaarmento di energia y e bon maneho di su consumo. Tambe a propone un club di medio ambiente pa cada scol of un competencia nacional di sostenibilidad. Fuera di esey a papia over di panelnan solar pa scolnan mes. Dor di e costo cu esakinan tin, por pensa riba accionnan pa recauda e fondo of busca e patrocinadonan. Otronan a tuma e pregunta den un perspectiva mas amplio. "E no ta bay pa un proyecto di un solo biaha. Sostenibilidad tin di haci cu futuro y cu nos tur. Nos mester percura cu e edificionan nobo di scol ta completamente sostenibel. Scolnan mester traha cu otro pa comparti proyectonan exitoso. Docentenan por intercambia di scolnan pa haci'e mas interesante pa e studiantenan." Esaki y hopi otro sugerencia di diferente tipo a hiba finalmente na e pensamiento cu despues no por a lag'e djis na e workshop aki. Pesey a dicidi pa duna un continuacion na e tres workshopnan di e ultimo simannan dor di bay traha cu un grupo di docente riba e implementacion structural di e tema sostenibilidad den educacion. Na comienso di siman pasa a tene un workshop na WEB. Aki e docentenan a haya un presentacion riba e cambionan cu WEB a haci durante ultimo añanan, caminda ta uza hopi menos fuel den e produccion di awa y electricidad y e prijsnan a bay te na esunnan mas abou den Caribe mientras cu e calidad ta esun di mas halto den e region.